

憺園文集

憺園文集卷第三十二

墓表

李映碧先生墓表

先生諱清字心水別號映碧先世句容人有諱秀者始渡江徙居興化秀生旭旭生鏜鏜生大學士文定公春芳文定仲子曰茂材以廕仕至太常寺少卿茂材生思誠累官禮部尚書思誠生長祺長祺生子二次先生也天啟辛酉舉於鄉崇禎辛未成進士筮仕司理寧波以考最擢刑科給事中先生同日上兩疏一言禦外敵當戰守兼治不當輕

言款禦內寇當勦撫並用不當專言招一言治獄
不宜置失入而獨罪失出因論尚書劉之鳳不職
狀尋以天旱復疏言此用刑鍛鍊刻深所致語侵
尚書甄淑淑遂劾先生把持詔鑄級調浙江布政
司照磨無何淑敗即家起吏科給事中先生入朝
疾朝臣日競門戶疏言國家門戶有二北門之鎖
鑰以三協爲門戶陪京之局鍵以兩淮爲門戶置
此不問而闕堂鬪穴長此安底疏入不報是秋遣
冊封新昌王崇禎十六年也明年京師陷弘光即
位南京遷工科都給事中先生見朝政日壞官方

大亂乃䟽言大讎未雪凡乘國難以拜官者義將
慚慟入地宜亟更前轍以圖光復又憤時議以偏
安自足抗䟽曰昔宋高之南渡也說者謂其病於
意足若陛下於今日其何足之有以河洛爲豐沛
則恭皇之舊封也爲恭皇所已有而不有則不足
以金陵爲長安則高帝之始基也爲高帝所全有
而不有則不足臣深望陛下無忘痛耻以此志爲
中外倡也倘陛下弛於上則諸臣必逸於下先帝
之深讐將安得而復哉且宋之南渡猶走李成擒
楊么以靖內制外今則獻猺交熾兩川危於累卵

汀潮南贛並以警聞北有旣毀之室南無可怕之
堂臣竊爲陛下危之疏上報聞而巳有司始諡愍
帝爲思宗先生言廟號同於漢後主禪請易之又
請補諡太子二王及開國靖難並累朝死諫諸臣
或以爲迂先生歎曰士大夫廉恥喪盡矣不於此
時顯微闡幽激發忠義之氣更復何望耶先生事
兩朝凡三居諫職章奏後先數十上並寢閣不行
尋遷大理寺左寺丞遣祀南鎮行甫及杭而南都
失守乃由間道趨隱松江之六保又渡江寓居高
郵久乃歸故園杜門不與人事當道屢薦不起凡

三十有八年而歿先生忠義蓋出天性愍帝之變
適在揚州聞之號慟幾絕自是每遇三月十九日
必設位以哭嘗曰吾家世受國恩吾以外吏蒙先
帝簡擢涓埃未報國亡後守其硜硜有死無二蓋
以此也初師事倪文正公元璐後聞文正殉難又
號慟者累日晚年著書自娛尤潛心史學爲史論
若干卷又刪注南北二史編次南渡錄諸忠紀略
等書藏於家嗚呼先生不幸丁明之季國事已不
可爲顧猶大聲疾呼侃侃建白卒未能以一木支
大厦及滄桑之後匿影林泉僅以勝代逸民老嗚

呼豈不重可悲也哉先生元配陳氏側室吳氏薛氏子三人曰稹曰蘭並太學生曰桡康熙癸丑進士今官左春坊左中允孫男女若干人桡與子有一日之雅自都下走書以先生狀謁文於子子特爲節其大略俾表於道庶幾尚論者有以察先生之志云

光祿大夫太子太保禮部尚書 誥贈太子太傅保和殿大學士諡文貞王公合葬墓表

今太子太傅大學士宛平王公在

世祖皇帝時與先太子太保禮部尚書文貞公後
先入翰林文貞公拜國史院學士太傅公亦遷弘
文院學士文貞公之爲禮部也太傅公亦以考績
加禮部尚書然勲階皆次文貞公下故不得追贈
其先世及 誥封父母文貞公之屢得恩典也輒
貶封其本生父母至太傅公之加尚書始得以一
品誥命贈梁夫人云及

今皇涖政太傅公在中樞文貞公薨後服闋膺爰
立之命次年恭遇

太宗皇帝實錄告成以勞晉秩太子太傅然後

覃恩及於四世贈文貞公如其官梁太夫人亦再
贈一品公既拜命嗚咽屬某曰吾受國異數榮及
所生顧吾親不得見矣即銘幽之辭已不及備將
揭石墓道載前人功德表

天子殊恩顧非子文不可敢固以請某惟乙未歲
以貢入京師拜公階下公一見待以國士指授爲
文肯要使稍有所聞以至今日者皆公力也敢以
不敏辭謹按公行狀及墓銘碑文爲記其大略如
左公諱崇簡字敬哉其先家任邱自公曾祖諱龍
始來京師祖諱鏜考陝西叅政加右布政司使諱

愛母張氏三世皆以公贈禮部尚書妣贈一品夫人
愛無子以兄錦衣衛正千戶諱爵之仲子爲後即
公也錦衣公及本生嫡母張氏生母焦氏並得貤
封公七歲喪布政公未幾錦衣公亦歿早孤煢然
嗣母張夫人督之成立情過已出公事兩夫人曲
盡孝道年二十六舉鄉試負海內重名爲清流引
重中崇禎十六年進士甲申三月京師破值焦夫
人喪給假治葬在外挈家潛奔金陵轉徙吳越間
久之江南平北還時

世祖廣求文學耆宿以充館選首授公內翰林國

史院庶吉士特免教習預修明實錄除秘書院簡
討歷侍讀國子監祭酒弘文院侍讀學士詔察明
末殉難臣公䟽言內外死事者合二十有八人以
上皆得贈諡時論以爲允遷詹事府少詹事兼侍
讀學士如故以疾請告十二年侍郎戴公明說薦
公可大用

世祖違部議特起之其明年以原官兼弘文院侍
讀學士遷國史院學士及太傅公旣遷弘文院
世祖臨朝歎爲盛事然以父子不可同列擢公吏
部右侍郎兼學士尋轉左遂拜禮部尚書明年加

太子太保公建言帝王廟祀宜及守成令辟因列
商中宗以下七人以上又言宋臣潘美張浚宜罷
祀詔從其言公學問該博尤諳練歷朝典故居禮
官多所建白皆折衷古今合於經義時議翕然歸
重然公自以父子並列六卿彌存謙退以夙疾請
告者再優詔不許會

世祖崩復固請如前十八年冬始得予告康熙三
年病良已遂以老乞致仕春秋纔六十三自是徬
徉林下者凡十有五年初公值喪亂播遷本無意
當世用遭遇

世祖皇帝以文學被知遇時與道會感激思奮然其確乎不可羈紲以富貴之意時時見於言語發於吟咏後堅請至四卒行其志本朝大臣年未及乞休於

主恩方渥之際進退終始卓然大節如公比者前此所未有也公家食益讀書引掖後進爲文章凡四方人士至都者以不及見公爲耻客至攝齊升堂必下階握手酌醴延款恒至夜分乃散其論文曰爲文必本於道道不出尋常行習之間自世有學道之名此道之所以日弊也又曰學莫要於自

得知之非艱行之維艱知而能行此聖賢之所以
幾於得也平生嗜學不倦年七十欲依古人以每
歲盡讀五經爲夏課其爲文雖卮言爛語無非仁
義道德嘗爲青箱堂記云階前闢露臺方丈餘歲
之夏秋日暮父子兄弟六七人率坐臺上或莊論
詩書或稱述祖父遺事旁及故舊家世之興衰以
爲勸誡一偶不至徬徨四顧若有缺然者世傳陳
仲弓之家門雍穆公蓋近之至今太傅公秉鈞贊
化一本公之家學而推而大之以及於天下則傳
所謂施於有政者豈不然歟公元配梁夫人撫治

鄖陽右副都御史贈兵部右侍郎諱應澤第二女
以淑慎佐公成名孝廉常口授論語孝經教其子
女公年二十即請置側室廣嗣續其卒時年三十
八公哀思之終身不再娶公薨於康熙十七年十
一月某日

上聞震悼敕給葬祭如故事諡曰文貞太傅公與
其諸弟以十八年四月某日葬公於梁夫人先所
窆地畏吾邨之西原後十年而乾學復表其墓道
太傅公名熙公冢子丁亥進士見任太子太傅保
和殿大學士兼禮部尚書加三級梁夫人出餘子

賴官監生湖廣常德府桃源縣知縣卒次然官監
教習見任刑部江西清吏司主事次照廕生見任
雲南按察司僉事分巡驛鹽道次燕廕生見任江
南鎮江府知府加二級次默歲貢生見任兵部督
捕司務孫男十一人長克善廕生江西按察使司
僉事分巡驛鹽道次克昌廕生戶部陝西清吏司
員外郎加二級克寬監生次克任庠生克遠庠生
克端監生克剛雙鶴蘭孫穩住存住曾孫男五人
長均次增次基次長麟次仲鳳余及公門垂四十
年期待良厚再至京師公已薨逝自媿迂踈伉直

與時齟齬茲請告將行撰公墓文深媿無所成就
辜負知己特書公雅尚及學問得力處以告來者
庶幾百世以後聞風興起也夫

顧庸菴先生墓表

先生諱樞字所止自號庸菴姓顧氏無錫人故光
祿少卿贈吏部右侍郎端文公之孫也世系詳吉
水鄒忠介公所撰端文公誌端文公三子仲孝廉
菲齋諱與沐娶武進唐氏歷戶部郎終夔州府知
府是爲先生之父先生年二十辛酉舉於鄉時爲
天啟改元之年朝廷方召用老成諸正人並列於

位先生親端文孫嘗受業高忠憲公忠憲公方在
朝諸名卿鉅儒若鄒忠介南臯趙忠毅儕鶴李尚
書修吾孫文介淇澳馮恭定少墟姚文毅現聞繆
文貞西溪周忠介蓼洲左忠毅滄嶼魏忠節廓園
十數公非先生之父行則大父行也咸相與引重
之先生亦自以高才席家世思乘時策名得自展
其所學既而不第歸比再上南宮則奄豎擅政清
流禍興諸君子皆惴惴焉莫必其命鄒趙孫馮諸
大老旣盡斥未幾忠毅忠節斃於獄明年忠憲正
命里中文貞忠介又慘死先生大慟曰所謂人之

云亡邦國殄瘁使吾祖而在亦必不免際此時會
吾蹙蹙何所騁乎於是鍵戶誦讀不復言當世事
每與忠憲子姓過水中居以寄其感慨憑弔之意
水中居者忠憲被放後所築四面皆水日夕坐卧
其中賓舊望之而不能即惟先生至輒架小橋渡
之款語終日故先生惻惻於此不能忘情焉愍帝
即位貂璫之禍雖熄而國事紛紜枋政者日排擊
善類甲戌會試烏程相主考先生五策直攻執政
不少隱諱分校者以首卷薦烏程視之面頸發赤
亟黜落之時文文肅公亦爲同考出謂夔州公曰

郎君對策名奏議也先生八試不第三中副榜而名益重丁丑盧忠烈九台總督諸路兵勦賊旣以楊編修機部贊畫軍事先生角巾訪之欲薦留先生叅其軍先生曰自古未有權臣在內而大將能立功於外者今武陵秉國加以高奄持憲行間軍謀掣肘盧公身爲大臣義無所避機部釋文學而語韜鈴猶覺非宜況吾書生可褰裳就之哉蓋忠烈召對日與武陵語忤遂示意監視高起潛齟齬之先生策其必敗謝去已而忠烈果戰歿其時京師復被兵逆黨阮大鍼觀以勤王復職號召徒衆

先生從弟子方與諸名士馳公檄逐之以先生望重欲首署其名先生謂無益徒生禍端固執不可後大鉞得志遂起大獄殺周儀部仲馭而子方與其友黃太冲吳次尾楊維斗沈崑銅緹騎逮問先生以居後獨得免鼎革後遂隱居不出東南數起大獄亦無有以先生爲口實者先生學本程朱以無欲主敬爲宗嘗曰聖門之學必先求仁求仁莫如敬又曰周子之無欲程朱之居敬窮理三者皆學之要也而無欲二字足以括之居敬是遏絕其欲心之萌窮理是扶其欲心之伏内外交養之功

四賢一轍至張子以禮爲學乃居敬窮理確有憑據處學者善法五子其庶幾乎又言讀書是格物之一事以窮理也即主敬之一事以存心也不然即是玩物喪志論明儒曰文清讀書錄言性字親切胡敬齋居業錄言敬字親切聖學嫡傳也六經無悟字悟字出內典而諸儒據爲傳習竊所未喻其所得如此嘗倣近思錄集端文所著十書爲語要又集忠憲語要抄朱子以下及薛敬軒曹月川胡敬齋羅整菴蔡虛齋魏莊渠諸先生語名悅心錄嘗夜讀頭上巾爲燈燼其一角久之不知也所

著述有隱居錄蒙言隨筆東林列傳明盛編十二
代詩刪八家詩刪史薈文薈多散佚不存今所刻
者易蒙西疇日抄諸書先生生於萬歷壬寅卒於
康熙戊申以子貞觀貴封徵仕郎內秘書院中書
舍人加一級元配王氏韶州知府儉齋公女儉齋即
端文壻也孺人賢淑早逝生卒詳華吏部所撰葬
志贈孺人繼配王氏光祿卿翼菴公孫女太學振
翼公女通曉書史婉靜溫恭執笄之初念尊嫜不
勝勞勩一切家政躬任之撫前母之女及側室子
如已出歲大稔或棄嬰孺於道輒命女奚收育常

佐先生賙五宗賑餒者未嘗操奇贏量力而後施里黨咸稱母德生於萬歷癸丑卒於康熙辛酉封太孺人子三人長景文邑庠生次廷文太學生爲仲氏後次即貞觀丙午舉人內國史院典籍加一級女二一適侯晉一適文學華瞻祖孫男九人孫女五人曾孫男一曾孫女三余童子時讀端文書心嚮往之先伯父中允公爲先生同年素知先生行義旣與典籍君交善先生尚無恙屢欲造先生之廬與上下其議論以宦遊弗果今因典籍君之請而書先生隧道聊以終吾嚮往之志也先生事

親以孝睦族以仁有所行擇地而蹈與人言恂恂
如不出諸口皆有可傳而吾獨書黨事梗概出處
學問之大者亦史氏之職云爾

澹園文集卷第三十二

憺園文集卷第三十三

祭文

祭都城隍文

竊惟民爲邦本食者民天其惟雨暘時若乃亦有
秋四月維夏保介是咨乃自春恒風雨澤愆降

至尊憂勤齋居秘殿分遣禮官設壇祈禱如故事
右侍郎徐乾學等當詣都城隍廟伏念京師輦轂
所臨地大物衆三月不雨種不入土兆姓皇白玉憂
不聊生惟神聰明正直爲畿甸主顯融燁赫默佑
真宰凡厥庶物無有留患神州赤縣實所倚賴當



斯旱暵蘊隆崇崇神宜怨恫其可曰予罔聞知是用敬竭丹誠奔走呼籲庶幾徼福於神其亦將天子命亟請

上帝期不越三日立降甘霖沛然滂沱三農式慰郊野懽騰實惟神之嘉貺如屯膏不下下民怨咨致使黼座焦思臣工蒿目是乾學等祝告弗虔咎其難逭神泣鄉食茲土聽亦不聰疇實職陰救菑捍患又何辭焉情詞懇迫幸賜昭鑒

祭陳夫子文

嗚呼維蘭陵之巨閥兮翳潁川其莫京緬開府之

休烈兮夫子式繼而騰驤薦賢書夫壯歲兮表名
德於鄭鄉爰振鐸於橋門兮粲題柱之仙郎司爽
鳩之曹署兮比平恕於于張歎治獄之不寃兮佇
集慶其無疆何十年之陪戟兮麾萬里於瀾滄辭
金門而夙駕兮指碧雞以戒裝值度支之鉤校兮
偶名及於封章雖謫宦其無懟兮畏投牒而徬徨
久辭榮而澹蕩兮忽騎箕以相羊追平生之歡暱
兮戚又比諸潘楊曩令子之舉京兆兮附青雲以
輝光進曲室而詔語兮嘗搯腕於維桑謂輪茵可
作器兮策駑馬於康莊媿坎壈于風塵兮負夫子

之扶將憶昨歲之朱明兮一再見於暨陽喜賡明
之捷南宮兮臨大江而飛觴羌余轅之局蹙兮將
遠涉于瀟湘過毗陵而言別兮期歲晚以登堂意
纏緜其難狀兮語覲縷而甚詳詎識斯會之永訣
兮若黯然而神傷夫子之髮未艾兮素健飯以康
強問撒瑟之何時兮嬰何疾以邁殃維夫子之慷
慨喜施兮恒坐困於熱腸意沈憂之傷人兮抑二
豎之披猖藉巫咸以招魂兮吾欲訴夫穹蒼如賢
子之克承先志兮維夫子爲不三倘死者其有知
兮應含笑於帝鄉獨驢鳴之甫作兮涕如雨而淋

浪閔予小子之昔邁大故兮賡明唁余于崑岡日
月忽其禪除兮更相哭于靈牀同斯辰之慘酷兮
心崩摧而不能詳陳虛筵兮雞黍漬乾絮兮酒漿
憑總帳而陳詞騷玉虬兮何方嗚呼哀哉

祭宋文恪公文

歲惟丁卯暮春三月公在中書忽示末疾冉冉踰
時驚傳病革馳詣寢門吞聲死別越日視斂改服
再入撫公遺孤哀哀雨泣頗憶周旋有如昨昔今
茲殿陛殊階異級昔者結言君車我筇今折輦行
投分加膝昔視猶弟肩隨武接小年蘄蘄意恥儔

列公早知名聲華翕集此挽彼推左扶右翼共規
遠大無負駒隙公薦賢書欬然通籍

先帝知公試之館職根柢詞林楷模士習曰余曷
弟叅差接迹前輩矜嚴地遠勢隔公讓不居引同
輿席念昔等夷深荷誘掖賜札繕草撤蓮下直
酬倡在公招尋退食少相慕用今已頭白中更小
別偶異南北一旦溘至永返其宅公之勲猷炳炳
奕奕福庇桑梓光垂簡策我獨羨公受祉多益少
壯登朝老無齟齬爲世福人天佑平格余輩無能
履順猶逆識寡才疎憂纏患迫未收拙效乃受窮

責跋扈前後鞭策心力我行孔艱公途坦適始爾
訃聞旁皇太息

帝心震悼羣工愴惻士嗟山殯國號棟旌存歿榮
寵神靈烜赫公心靡寧抱恨魂魄有父有祖未就
窀穸公身雖留公心閔默 國恩在身欲去未得
讀公遺疏淚枯灑血公之令子才優繼述餘祉未
艾公其奚戚神爽非遙享我清醑

再祭宋文恪公文

聖皇在御悼失宗臣臨軒慨歎三事大夫暨百執
事罔弗悲惋矧予兄弟追從多年託始童丱登公

之堂弔服如麻揮涕如汗人亦有言升屋三號萬
事冰泮惟公立身嚴氣正性百僚敬憚論定蓋棺
紀績史氏本末一貫殊恩備禮載遣朝官護歸
里開啓行有日即於東郊潞河漫漫白衣素冠趨
送都亭心曲煩亂明月輝輝蟾兔將缺邈焉河漢
巍哉中書台星驟隕凋此偉幹天道莫知生死榮
瘁巧歷難筭公靈南顧季秋霜落江則有岍鄉國
風煙葱葱鬱鬱漸在几案廣柳之車不入郭門蔽
于俗諺邦禮忝司聿稽前典滌除誕謾喪歸脫輅
殯于兩楹古禮可按公車安行過闔入市笳鼓嘈

嘖吁嗟吳都夙夜在公履綦久判履道坊中有宅
一區非侈榮觀靈兮歸來克踐屏著神爽式宴念
我平生惘惘日月汨于昏宦少公數齡靜數駒隙
不堪把玩冀公政成比跡二疏光施親串白首過
從預陪午橋策一欵段勞逸之數前後相準庶幾
得半何圖忽焉遂有今日風流雲散攀戀芝輜情
不自已奏茲哀彈啞啞霜空城頭蘆管助我腸斷

祭李南宮文

霜淒露凝歲序向闌停雲長懷悲來無端有問自
南俾我汎瀾胡天不弔折玉摧蘭憶過高齋哭我

駕部君駕在原經紀保護不棄封非曰予飲助豈
惟姻亞亦繫舊故君夙好事賞鑒尤精世有傳書
金石碑銘次居彝鼎等署丹青久近呈識高下受
評于處于語載所載夕曲砌花紅疎簾月白烟冪
西樓雲罨南陌覩景愴懷臨觴歎息分手河梁於
今十年緇塵堀堞東華往還亦有清夢時落林泉
跂望勿及跂立停鞭未老而衰雪刺盈顛沉李浮
瓜菹松剪韭道欵披襟思我良友君止我來謂當
非久不然遲君薊門杯酒策名清時取印繫肘胡
然溘逝凶訃在茲旣疑且悼相見無期言笑如昨

遂成訣詞君家世德流澤孔宏太丘是父元方是
兄八龍方駕三鳳迭鳴侍御投分紉蘭佩葯乃與
駕部昏姻是託雷陳新特孔李夙諾故舊凋喪歲
月侵尋水部郡丞與君嗣音掉鞅詞壇才力堪任
非獨弓裘紹承厥世十畝陰敷九里潤至交朋同
歡親串均賜君又棄我命不可堪嗷然長號涕泗
曷禁千里致奠將余斯文

祭汪蛟門文

刑部浙江清吏司主事蛟門汪君罷官里居遽疾
而卒計至都門其友經筵講官刑部尚書徐乾

學哭盡哀謹具酒脯之奠爲文以告君之靈曰始
余求友聞名思君獲披雲霧君來吳門余居下邑
山城水闌扁舟惠然久要是敦晨展書卷宵拈酒
尊察君胸臆定非俗人余渡揚子言尋舊雨延賓
開徑接坐揮塵君言世路乃太不古謬以脇肩稱
爲僂僂五羖力挽君其余輔弗能嚙嚙亦合蹢蹢
時余答君物忌太剛譬諸鑿枘持圓納方懷抱利
器君當善藏用相戒勗因而慨慷之子之操修名
必彰高談沉醉平山夕陽分手無何各至京邑君
官紫薇久次子立余還詞館重攜書笈于時東觀

羣賢畢集分司筆削伍伍什什班范俯視南董平
揖舍弟承恩監局是忝珍君之才可鐫琬琰欽
君之直宜贊褒貶遂以君名登諸薦剡君與史局
彌自退斂汗青無期歲華荏苒余居巷南君居巷
北招尋過從豁此偏側商略舊聞徵所記憶余釋
君疑君解余惑至于論詩余守貞則君宗蘇陸優
入其域君在秋曹曾未滿歲聰明忠愛事無留滯
古人有言議事以制春秋刑書仍秉義例當官而
行謝絕一切余但覺君溫溫豈弟何圖蜚語忽聞
九重莫測何由置辨無從奏當君徙恩許歸農

踉蹌去都不成別蹤便爲永訣觀絕音容聞君之
還頗能自遣討論掌故手書通典鄭志爲攷異同
之辨樂天知命玩占大衍如此攝生云胡不善理
數到君復自乖舛君之屈枉

帝心漸察故人百口爲君辨別孔融薦禰恨余薄
劣待熄謗熒昌言論列君遽下世銜冤未雪君倘
不死余猶存舌君今已矣萬事俱虛可傳者名生
平有書君在夜臺不畏暎車藐孤之託良執愧余
恤君喪紀匏繫其如臨風哀此三君其鑒諸

祭李文勤公文

國寶元老家承間氣韋平重代表揚奕世弱冠登
朝渥恩存至立年秉均黑頭奚啻十有七載不
懈于位德則施溥躬惟盡瘁先公文敏才子幾人
畹蘭滋晚貴有異徵遭遇

世祖風雲契深密勿帷幄廻翔蓬瀛接物謙抑居
心篤誠訏謨啓沃罕聞外庭鼎湖上仙咸池繼照
抱弓行號援筆草詔

今上冲齡恭默思道博陸受遺持權勢要公于是
時從容廊廟調和截羹伊鼎匪竈

上旣乘乾親攬八枋股肱惟臣平章庶政有承有

弼無竇無徑雅量方裴鎮俗比震六語君實一能
蒙正行馬施門三階八命當軸逾紀績凝揆敘噬
將乞閒東山容與不可以請 國有師旅幾神淵
謐贊決奮武張弛威弧陳設齊斧四方旣平公在
政府昔有良史欲識其大時事得失將相罷拜以
是叅稽責有所在欲知相業試觀帝載惟曰益章
致此無外中書歷考幾同汾陽光輔兩朝羽儀堂
堂練達事體明解典章決疑定豫處變守常故牘
可覆彌久弗忘靡所附和而非激亢清約之操廳
容旋馬先民是程拔葵于舍精思有亭不成三五

童隸拜賓衣帛蓋寡子弟洵莊咸就陶冶周親故
人大庇廣廈而愚兄弟仰秉先覺亦步亦趨翹材
東閣知己之感罄欬猶昨高文大篇屬序乾學去
歲元文咎積譴薄公再過存相慰且愕曾幾何時
顏衰憂惡是月朔二猶來史館顧謂諸公僕病其
道強起至此簡青宜汗滸第病加晨發漱盥寢疾
及旬騎箕上漢嗚呼山頽木壞天不憖遺安所仰
倣吾儕之私里春輟相哀此蒼黎旂常鍾鼎公名
永存致以芻束侑以此辭公爲星辰降格于斯

祭孫學士文

三十八
昔公與余同擢禮闈衆中目公籍甚清微迄乎臚
唱並及甲第余忝三人公唱第二雲見五色實當
其徵國儲碩輔余得良朋蒙 恩召對賦詩 便
殿公最稱 旨日承 天眷惟公之才爾雅宏博
下筆自然氣象臺閣爰在學館拔侍講筵遂令每
日說書

上前公所引伸驗今稽古不第數陳章句訓詁
上於清燕顧問從容 宸遊扈蹕屢命公從
上幸南苑輦起于側 命公射之壹發洞臆賜公
使還祀其先人所以寵公榮及其親

上

公于行在倚馬應制藉草記載陪幸東吳
公鄉井

上特諭公還家觀省

上之幸魯夜半行幄傳示講義坐待揚確公爲學
士初掌綸誥廻翔中外於今再到兩承嘉命造
就常吉惟茲乙丑被命同日余鄙無能與公共
事坐則一堂出則並轡間以文酒造勤過數公貳
冬官俾入淮海方略秘授輿論旁採惟公之才實
優經濟往來相度指悉形勢經始岡門躬督畚鍤

既有成緒條列奏劄紛紜異論遂阻成勞公雖左
官天語有褒曾未踰時來復其所公志益奮稷
契自許何圖中道遽爾隕謝天不慙遺令人悲咤
永訣之言疾豈可治緣感四字不言可知口占遺
表君父罔極賢哲正終惟餘悃悃嗚呼哀哉年譜
之誼視猶弟兄官聯晨夕投分彌誠公爲考官甄
陶多士先後公門一弟子念言斯誼詎等尋恒
塞帷撫棺耿耿寢興高堂白髮諸孤穉齒勲業悵
然平生已矣靈輜將返奠酒盈觴寫心相告述此
誄章

祭姚岱麓先生文

自公與元文爲同年既又共事秦闈而乾學亦從
廷中獲交公也公伉爽自喜遇人過輒訟言不少
休城府不設於胸也余兄弟遂相得日驩目爲靜
友異闕失大賴其磨礪也公多怪少可然獨不鄙
棄余兄弟以爲非吳下何蒙也是時公在言路余
兄弟官侍從館閣與省垣相望禁中也每奏對後
聯袂而出各歸省院意氣甚和同也嘗伏 殿陛
論天下大事辭指激切同列未嘗不動容也雖或
批逆鱗不惜 當宁獨鑒公忠所請皆曲意從也

因而歎

主上至聖至明能受直言如漢文帝有止輦之風也余兄弟先後爲憲長時有所獻替然每愧不如公正色立朝能啓沃聰明也公由此結契獨知擢僉憲一時臺紀爲之肅清輦下莫不避驄也會蜀缺撫官

天子以蜀屢當蹂躪非特遣公忠廉大臣以治之不足子惠困窮也

上又臨軒詔公凡有不利于民其以聞勿令壅也公再拜受命涖成都御史臺府視事進百司而告

誠之如

上指令各言地方利病母有所蔽不通也首奏罷採木其他章滿銀臺皆前此大吏所知而不肯言者蜀民藉公爲幘幪也余兄弟嘗言公治蜀如漢諸葛宋張詠餘子瑣瑣不足道真周禮所謂民功曰庸也方謂公雖主蜀

上眷注公特甚當如某邑入爲大司農也胡圖食少事煩公之事業不究而始筮仕於蜀者竟以蜀終也使余兄弟不獲終身事公時聞讜言以省厥躬也不禁嗚咽失聲旣哭吾私而復爲天下慟

也

祭納蘭君文

造物之植扶輿之靈胚胎前光間氣篤生孰天其
年不究其用宣聖有言夫人爲慟嗚呼侍中思皇
亦世注水丹山難方所自孝友之性允也天至纔
舞象勺已通六藝往年鎖院吾徒相繼秋賦獻書
春卿擢桂僉謂之子宜郗詵第事有不然殆難意
計金張珥貂簡在惟

帝嗚呼侍中出入承恩帷幄驂駢左右

至尊遠猷祕議外庭罕聞以其餘閒工爲詩文凡

諸翰墨靡不究論師資之義契託慙懃古風云邈
子也實敦子之求友紵縞弗緩於子乎館如歸咏
歎崔駰將老生入玉門喪紀孤稚還復恤存嗚呼
此道於今難言海內相期韋平重代

帝心所屬公望斯在子之不祿吁咄可怪七日不
汗悠悠茫昧此日几筵前日嘉會百年之身罔不
敝壞宜貞而脆問天莫對適然者命已知猶慨嗚
呼侍中頓隔重泉遺言靡私益欽子賢

聖情震悼中使來宣子之嚴親痛毒涕連朋遊惆
惘迴腸內煎雖未識子如久週旋子之詩文清新

鮮妍花間草堂无多可傳都爲一集使就雕鐫吾
徒之責子無憊焉尊酒平生總帳何縣一歌哀些
淚灑終篇

祭范忠貞公文

在宋慶曆惟文正公將符相印出入從容逞茲西
夏狂孽不恭廟謀閫略式遏猗克桓桓忠宣繼軌
接跡韋平重拜奕世戴德忠規孝緒書之于策勿
替引之君子之澤自他有耀必復其始惟大司馬
瀋陽再起弗協時奸移疾歸里五世之後太傅鼎
司自我國家開基北陸風雲日月名世應期入

關扶義定策敷辭功存斷鼉帶礪以貽伏聞先生
夙慧拔俗脫略綺紵比方蘭玉有時趨庭詩禮是
勗射策甲科登瀛授籙

帝曰汝諧往師德造其惟吉士祇承斯詔先生循
誘靡所不到匪言是諄惟躬是蹈帷幄經綸密勿
叅與啓沃靡多名迹靡素豈止秘談溫室之樹生
民已任待舉而措五湖三江浙水東西其民保聚
水食巖棲澤深萑苻海沸鯨鯢吏失端平困我烝
黎先生開府撫循其土強者搏擊弱者哺乳垢者
洗濯怠者鼓舞桴鼓息聞餘腥絕覩里閭歌呼飲

食晏樂父老告語夜息早作范公我憂綏我耕鑿
俾我人斯補瘡愈瘼

天眷南顧有詔念功往督閩閩旌鉞優崇先生曰
咨臣實有胸欲告我 后其故非躬惟

帝曰俞其來覲只單車入朝云胡不喜晝日三接
寵錫靡已路車乘馬彤弓盧矢惟茲閩疆海多氛
祲先生誓志服以威信使跳梁者去逆效順吾人
龍戶皆沾 天潤吁嗟先生志殲小醜詎謂倉皇
變生掖肘背恩干紀脩蛇瘳狗劫脅守臣從者某
某烈烈先生身被拘執隸夫環伺求死不得梁肉

堆案浹旬不食臞則體膚厲乃神色有許生者在
隸之伍密以其誠相披肝腑敬告先生必斃彼豎
俟間乘之可以計取吁嗟先生啜粥飲水三年徽
纆裂眦切齒常山舌存罵詈及死武夷一曲血淚
盈紙 王旅致討彼豎窮蹙從先生者賓客童僕
五十餘人旣惟荼毒義士憤痛匍匐入哭難之始
作實惟先生猝不及謀單獨一身惟攜曆朔夙夜
君親衣冠肅拜諱日吉辰剪爪及髮以寄老母身
則許 國捐糜何有精變天地日中見斗有賊排
闥其狀赳赳吁嗟先生心知其故衣冠北向稽顙

呼籲孤臣下地從先太傅入手植立引繩絕嗉皎皎許生義衷相激憑尸一慟去去何適三匿山中靈骨是覓守伺焚櫬夜半人寂負以間行達于京師所寄爪髮適至全歸

天情震悼數日不怡大臣臨祭異數先施贈官字孤將有後命謚法所宜太常議定吁嗟先生得氣之正亘古不磨金堅玉瑩嗚呼哀哉葬剡鮑信夢歸溫序孰似先生全歸惟許尚友百世誰是其侶魯國信國可同日語某等夙師景行近仰風烈想魂萬里肝腸寸裂仰瞻帷幕生芻是設陵谷可易

盛名不滅

祭施研山文

惟公爲國之紀爲民之坊鑄于鼎鼎標以旂常胡
爲中壽等視彭殤追懷夙昔悲慟難忘公在髫年
珠蘭玉蕙暨登巍科英才貴際江郡發硎題輿作
礪張翮舉鬢耆青驄結轡草昧初闢地大物衆薺荼
味揉薰蕕器共公謂狐狸豺狼所縱捨本斲枝墨
習愈雍臣工食祿商賈貿遷如何債帥舟貨盈川
司關誰何揚舲直前非公抗疏莫之禁旃弁虎而
冠不麗考功都府節鉞賓主雍容附翼搏噬害甚

養癰非公抗疏孰折狂鋒州牧隱盜庇卒誣守亂
軍恣掠帥者袖手臺諫舉劾風聞受咎齟政蕪萊
寓公爲莠彼皆巨猾上結奧援黑藻爲白方揉爲
圓公發白簡捷于轉丸秦土遼廓兵燹經世阡澮
榛莽民人凋弊社鼠城狐橫螫邪噬繡衣一振魑
魅奔避安邑鹵池兵食所賴藏蠹橐蟲百情千態
窒漏填穴商民交泰楚牧無良蓋藏墨吏露章舉
刺卽與廢棄酷吏刈民肆赦免議公正其律人知
畏忌東南民疲骨折脂乾正役雜徭侵漁百端訴
天謁鬼俯泣仰歎公開生路龍畝以安宋世吳郡

兼有嘉禾賦三十萬視唐孔多明加十倍肉盡骨
磨言雖未效已見謳歌其他利弊章數十上或俞
或否謨猷忠諒 詔需超擢還趨身行月卿五遷
迄佐亞相霜臺峻秩百辟具瞻公當大任僉曰宜
然振刷偷惰洗滌膠黏大吏知恥政肅民恬小東
大東矐言周道憚人靡息官靡政擾撫以恩威爲
物師表庸墨屏跡強暴如掃天災流行齊魯幾徧
捐貲留漕以董以先螫螫得哺肉生鵠面鄭公青
州于茲復見公之衣裾紉故澣潔公之庖屨杞餐
菊啜屬吏改絃過客迴轍惟

帝念功移鎮兩浙風雷之後陽和始回夏日非杳
冬日其衰不假吏手移奏自裁騶從簡希恩逮輿
臺折彼滯獄平典協中誅其桀驚恤其羸癰客丘
披盜反爲墓戎公言于朝毋使夜訖食不勝事以
困諸葛念言戎重宜駐太末新啓幕府實惟草萊
閩地初平鎮厭是需遺艱投大維公匪餘未安即
次復被除書星言夙駕甫及下車使星至止海壖
爰度有 詔節鉞與俱經略徂春度嶺首夏疾作
故知不起乃命勿藥

天子震悼因朝涕泗學等兄弟相于託契落月屋

梁恍如夢寐昔共京邑更相招邀談藝永日覆斗
盤霄雜以諧謔于焉逍遙公出宰物星霜亟易郵
筒去來不異曩昔功奏還朝仍同朝夕忽聞大故
肝摧腸割山河阻絕七千里遙昂藏八尺如見丰
標情踰潘誅詞愧楚招幽明何隔應鑒悲號

教習張公祭文

於惟夫子降神峻極豐沛自起幼標令德允文允
武經邦華國東觀秘府西清禁地鸞坡迴翔貂
珥近侍久處機密恒叅諷議二京研思三篋強識
才惟公望道洽人師精論書勢考質經疑藹然函

文肅矣臯比慇懃指授怵惕箴規滔滔河濟巖巖
岱宗錫履尚父啓宇元公奄有齊魯拜兼附庸擁
旄秉鉞填撫于東生平夙負澄清之志承 命慨
慷登車攬轡買犢猷耕飲羊息僞威行矚族綬解
墨吏蓮幕方紅油幢正碧警絕里鼓衛祇門戟碑
看叔子棠憇召伯豪猾舞號籥羸悵惜來暮纔歌
去思流韻在于出處曾無喜愠處晦彌彰養高發
聞博稽淵奧博核典訓學等夙承提誨有所仰倣
今親警效逾欽忠讜澄懷霽月爽致秋朗坐不隱
几行靡扶杖宜躋上壽宜膺篤祐髦期不倦吳札

衛武詎是一朝頓令萬古嗚呼束芻置前兩楹徵
夢羣居則經哀至常慟起塚慙已擬招愧宋長跼
陳辭中心悼痛

祭馬鳴鑾文

嗚呼惟君鄉國之秀夜光積玉曜我崑岫珠盤之
長六藝之囿揚徽樹幟掉鞅馳驟樂我兄弟早相
暱就翔集同岑步趨瞠後我有姊氏華齡並茂林
風散朗頌圖夙授清溪王謝允諧昏媾逮我羣從
咸稱甥舅君舉南宮歲行癸丑海宇昇平

聖人在宥玉堂膺選共推襟袖根柢詞林羽儀輦

繡焦明阿閣龍馬天廐寶采方妍銅聲未瘦時子
兄弟鵷班幸蓮接烏連轡牽絲結綬朱旂嚮晨彤
墀待漏柳市春陰藥欄清晝退食餘閒遺編共究
鼓辨岐蒐碑摹岫嶠宴飲樂胥賓軒室又瑟媚將
希鐘洪屢扣蕃社方融忽懷鄉舊思樂故園清暉
淑侯薛澱尊鱸夫椒橘柚胡寧捨此塵途久逗君
雖撫仕宦情匪厚朱紱朝弛蘭泉夕漱一卧十年
不通朝右蔭柳歌鸞披蘿落狝駕止柴車餽無兼
豆壺榼時攜茗糜日鬪朝野顒顒望君來復璠璣
在懷云何不售乃墜離鴻遂傳凶赴閔慕奚從茫

茫宇宙嗚呼哀哉弟宦學相同情均骨肉匪但葦
連更殷蘭吳顧茲匏徒懷巖竇哭不披帷奠不
親侑日月不居輶車引柩遙想衡門千兩輻輳
縣神理金石匪壽敬託哀章抒此謏陋

哀辭

內閣中書舍人黃君哀辭

君諱初緒字繼武吾郡崇明人余與之交十有八
年矣方順治甲午歲詔天下學臣選生員入太
學今侍郎灤州石公以侍講督江南學政所錄五
十人君與吳縣繆脩撰某丹徒張編脩某及金皆

預余與三君相善也在苒十餘年君試禮部哀然舉首繆與張並及第君以第二甲進士試授內閣中書舍人越三年余在詞館君來就職未幾張以病告歸繆丁母憂去惟與君朝夕相見而君一旦謝棄人間矣君之歿也以九月四日張編脩於七月十四日卒於家計問至時君已病惟恐君之知而傷痛也不以告君而君亦遂以不起豈不悲哉君向居崇明鼎革初遷府城之西偏父某以貲入官至太僕寺卿家素豐裕自海疆多事始終落君事父母至孝居喪毀瘠骨立視躬廉靜粹然儒者

所居閭門內數椽僅可容膝食不重肉然召客輒
盛作供具遇窮交故戚施予不倦讀書自諸經二
十一史詳稽博討旁及百家文章六壬遁甲之術
無所不通曉然見人輒簡默似不能言者素知兵
有幹略然未嘗以語人當甲午冬諸生謁灤州公
於江陰問曰若即黃某耶爾守城有功向者大帥
以告我蓋君在其邑曾親冒矢石捍禦大寇當事
欲疏其功君弗願乃已余因灤州公言詢其邑人
乃稍稍得知云君性澹泊無所干於人在官俸給
不多量入爲用每三日一入直僦肩輿以往餘日

扃門謝客敝裘蔬食人初見之不知其已宦達也
中書舍人於唐宋爲兩制要官今則如漢丞相掾
史唐尚書省都事主事之屬又但供錄寫無有職
事自前明多以貲入至今始用清流君成進士例
當除縣令以需次遲滯請試得授旣而悔之以爲
令縱卑冗尚得有所表暴今雖在禁密之地碌碌
無短長固不若州縣矣每爲余言常忽忽不樂以
至於死悲夫辭曰

嗚呼誰謂繼武而止於斯悠悠蒼天莫之或知年
甫屆於知非兮遽奄謝其若茲粲粲省人之聲譽

今名已標於鳳池顧懷才而未試兮握瑾瑜其何
之病舉世之齷齪兮陋鄉里之小兒時壹鬱以不
平兮每被酒而歎咨豈中情之侘傺兮雖倉扁其
不可醫邇知已之平生兮夫何能而不悲

行狀

光祿大夫太子太傅吏部尚書文華殿大
學士加一級宋文恪公行狀

曾祖道明

祖琦贈資政大夫吏部尚書文華殿大學士
父學周贈資政大夫吏部尚書文華殿大學士

本生父學朱巡按山東監察御史贈嘉議大夫
大理寺卿累贈資政大夫吏部尚書文華殿大
學士

公諱德宜字右之別字蓼天江南蘇州府長洲縣
人母王太夫人有娠夢狡狴入室生公有異表面
如白玉高顴豐下目炯炯射人幼出嗣伯父母伯
父母早世仍鞠育于本父母八歲能爲文十三入
籍崇明爲學官弟子歲在己卯公父以監察御史
巡按山東濟南城破及於難公年十七重趼至京
師伏闕請卹久之得贈大理寺卿順治五年中江

南鄉試凡三試禮部乃中式 賜進士出身第三
人改庶吉士以本生母喪歸持齊衰期年服心喪
三年畢乃至京師館中故事庶吉士假滿當補教
習

世祖章皇帝特授公翰林院編修仍在館讀書十
八年始散館時江南大吏覈逋賦羅姓名以聞於
朝里胥誤竄公名籍中遂挂吏議公具陳其誣
久之得白補原官康熙三年遷國子監司業六年
轉翰林院侍讀八年陞國子監祭酒嚴立條教除
積弊召姦猾吏金某至邸笞之百六館師生人人

敬憚際今

天子親政後諏吉月車駕臨太學釋奠於先師
御彝倫堂賜公東向坐講周易乾卦辭宗藩
宿衛大小百寮暨太學生徒以及耆老園橋門聽
講者數千人咸歎服未幾遷翰林院侍讀學士十
年

天子初開講幄命儒臣以次進講親簡八人
充日講起居注官公與焉尋充經筵講官明年遷
內閣學士兼禮部侍郎

上素器公數顧問即以質對風度端重進止舒徐

每奏事畢

上恒目送焉

駕幸口外駐蹕赤城公時扈從

上從容問及江南逋賦之田公言江南多版荒田冊載虛名實無租入可供國課非盡官吏中飽因極言蘇松賦稅獨重民力弊劫辭甚悉會詔免蘇松等四郡錢糧之半高陽李文勤公謂公曰君一言之力也十三年戶部侍郎貪缺

上以命公仍兼翰林院學士詞臣佐戶部得兼學士銜自公始既受事剔宿弊發私餽親自握筭鉤稽文卷值滇黔蜀叛秦楚東西粵軍需孔迫大農

議盡以江南歲輸充餉公念江鄉歲祲徵求不前
又道遠慮貽誤力持不可乃就用兵近地酌撥餉
以濟而江南得不重困居一年調吏部右侍郎明
年轉左又明年遷都察院左都御史上疏請弛海
禁令沿海居民藉佃魚資生計請定鹽法考課罷
省筆帖式請禁通販硫黃硝決機殄寇又言捐金
者得授官非經久制宜請限以月或以年庶幾官
方以澄所言次第舉行又率同院上言各處統兵
大將軍王以下玩寇殃民遷延歲月或購取婦女
或攘奪民財物荼毒匪細請 旨嚴飭

上是之命集諸王大臣速議申飭嚴禁由是行間
將帥凜凜畏國憲

孝昭皇后上賓

聖心哀悼公上言宵旰憂勞之日尤宜秉禮節哀
慎起居出入又載籍浩繁博不如約願略方名象
數之煩但擇有關政治裨益身心者討論講習稍
節耳目之勞用保中和之德

上喜溫旨批答山東大帥柯永綦縱兵鼓譟具疏
直糾

上即命逮至京訊治尋遷刑部尚書調兵部時蜀

初定大軍糗糧皆運自陝西道出劍閣顛踣者相枕藉陝西民大困公因星變言今大軍趨黔旦暮望秦蜀之餉然徵秦則以道里險遠而誘之蜀徵蜀則以近地不足而取之秦惟以川陝各設總督彼此觀望無異越人視秦人之肥瘠也蜀地非不足於粟莫若併川陝總督爲一人則痛癢相關隨地調發庶幾秦民得以少休其力矣

上大悅卽如公議行川陝兵民交稱便值滇黔粵蜀以次削平俘獲賊中婦女並著籍旗下公言脇從者不與倡亂同罪且婦女何辜宜聽收贖於所

釋甚衆二十一年調吏部尚書杜絕請託清釐銓
法老吏斂手不敢爲奸歲在甲子七月以文華殿
大學士入閣辦事丙寅晉太子太傅丁卯六月以
疾卒於官享年六十有二公之寢疾也

上垂問再三計聞軫悼遣閣臣攜茶酒 賜奠柩

前以其年秋八月喪歸某年月日葬某原祖妣朱
氏妣丁氏本生妣王氏皆累贈夫人娶王氏封恭
人累贈夫人子男四人駿業翰林院待詔敬業國
子監生早卒大業翰林院庶吉士建業國子監生
女十人一嫁日講官起居注翰林院編修顧藻一嫁

日講官起居注翰林院侍讀王掞一嫁州同知金相戊一嫁壬戌榜進士顧用霖一嫁日講官起居注翰林院編修陳元龍一嫁辛酉科舉人朱之敦一嫁翰林院編修李孚青一許配國子監生錢聯一許配裘岱生一許配繆惟公至性孝友母在自食粗糲以甘毳爲養親歿後忌日輒素服避賓客涕泣在都下聞弟喪兼程還經理身後事撫育孤女踰已出惇于宗族貧者輒賙以粟與兄德宸弟德宏早著聞譽一時有三宋之目擇交必慎海內名士見者傾心寫意敦槃之會吳申至今傳爲盛

事焉及貴寒畯有文采者雖不相識汲引不倦甲辰充會試同考官丙辰己未兩主會試五充文武殿試讀卷官詔舉博學鴻詞以汪琬陳維崧薦俱授翰林故人孫暘吳兆騫徙遼左捐金贖之還兆騫客死爲經營其歸櫬生平寡言笑未嘗見喜愠之色有非意相干者不校遇賓客甚恭窮交造謁者必見縞紵遺贈久而不衰寬以御下無疾言遽色而門以内肅然家人不敢以褻服見也與修通鑑全書充

世祖章皇帝實錄纂修官

太祖高皇帝實錄總裁官兼充

三朝聖訓 平定三逆方略 政治典訓 大清會

典 大清一統志等書總裁官明史監修官又奉

命評隲古文淵鑒始終以文字受

主知公剛毅木訥造次不能達其詞至於國家大事論議侃侃同列意見有異輒爲之剖晰是非反覆開導或至累日往往感悟其或勢不可挽則自爲一議

上每善公所陳多報可公遇 覃恩貤封者五加

級者六黑狐紫貂衣裘文鏐采弊天馬上尊玉粒

珍果之 賜匪一然服官三十年不一問及生產
未仕時有薄田數頃初不增益城西有宅一區門
巷蕭然里人忘其在樞要也公立三不朽同朝公
卿所共聞見某於公同鄉曲於學同席研於仕爲
公後進知公較詳謹狀公歷官行事乞銘作者俾
國史得以編錄焉謹狀

河南提學僉事封通議大夫內閣學士兼
禮部侍郎張公行狀

曾祖浹曾祖母 氏

祖拍布政使司經歷祖母 氏

父鳳儀封文林郎行人司行人贈通議大夫內閣學士兼禮部侍郎母錢氏贈孺人再贈淑人公姓張氏諱九徵字公選號曰湘曉其先爲中州人元末有字善甫者始遷居鎮江府丹徒縣爲其縣人子德明仕明建文時爲戶科源士犒師東昌遇燕兵被執不屈斷臂死數傳至浹浹子柏以出粟賑饑授布政司經歷三子公考季也以公貴封旣又以公子侍郎貴得兩世贈典公年二十九舉順治乙酉鄉試第一時初經喪亂人多廢學科舉之文猶沿明季蕪詭之習公文宏雅博大爲一代

模楷王文貞公在翰林一見深器重之丁亥成進士踰年爲行人司行人頒詔福建又二年

世祖章皇帝親政視學奉命之闕里宣符聖公又二年考選爲吏部文選司主事熟諳掌故人共驚異郎中宋某曰張君爲秀才時已爛熟胸中矣未幾宋被謫去正副選郎皆闕人公以主事典選輿論翕服旋陞員外郎明年陞驗封司郎中冬調考功時安丘以閣臣掌部務龔端毅爲都御史公佐之主察人服公明乙未以封公年高請養未抵家聞訃再期哭泣卜葬未食墨猶殯阼階以是久

不赴補三何海寇作亂犯鎮江提帥兵少戰潰公與筴御史重光嬰城守禦副將高謙知府戴可進蓄異志顧語城下曰衆皆欲降獨某某不從爾賊謂曰惟爾等速圖之公與筴聞之急趨下城而門牡已啓賊蜂擁入筴縋城去公微服出城東門日暮得一艇脫身走常州謁巡撫蔣公言海寇烏合易破宜速進兵又至浙江趣督撫嚴兵堵賊歸路未幾賊敗果如公畫始賊入城名捕公不得繫家衆焚掠公舍時封公柩在堂火將及回燄不熱如有神護康熙二年補稽勲司郎中秋調文選益都

孫文定公柏鄉魏公先後爲冢宰咸加敬禮令甲
初更吏部郎與他曹一例以方面推補明年公以
河南按察司僉事出視學政公在吏部歷資十餘
年聲譽焯赫時論以爲旦晚臺閣顧得平調士大
夫無不惋歎公略不介意河南兵荒後文治日衰
公設立條格獎拔孤寒倡明禮教兩河人士歎爲
百年未有黜中年潘岳祀典祀尚書鐵鉉於鄧州
求其裔孫奉祠祀增置社學擇師教郡邑子弟令
誦小學家禮二書辨正字體舛訛嫻習灑掃進退
之節以培初學根本又斥俸錢廣購書籍置學中

便諸生就讀一時風氣以變事竣考核爲天下第一當擢京堂有尼之者乃止會撫臣疏舉卓異詔賜蟒衣俞部議需次超遷公已誓墓不欲出矣康熙十七年詔舉博學鴻儒家宰郝恭定公少宰通州張公列公名上比疏下督撫促赴召公引疾控辭詔不許公復懇辭于是部議病痊赴召詔報可公引疾時貽友人詩有句云少不如人何況老身將終隱又焉文又遣懷云虛名空笑羊公鶴肥遯深慚梁伯鸞京雒少年爭獻賦伏生接武賈生難人以是知公不出之意決也公遂

于史學氏所指陳歷代治亂得失之故及故明人物如指諸掌聽者終日忘疲公子侍郎總裁史局公手疏示侍郎大指事功推新寔才略推江陵經濟推王三原又論周文襄和易近人不免經權互用惟王端毅爲無間端毅雖疾惡如仇而虛心靜氣人人樂効忠告海忠介遠不能及徐華亭年四十爲少宰延攬朝士衆譽翕然歸之其精神實出前後諸公之上後惟葉福清似之時勢各殊故設施亦異其爲機警則一也又言江陵爲治政尚嚴密巡方審錄至以多決因爲功當國者不可雜用

申韓之學如此即矯其弊而爲寬縱又傷治體蓋
皆篤論云居平教子具有規範故侍郎兄弟均以
文行顯名侍郎被眷優渥每得寵賚必進之公
公榮君賜輒貽書以主恩難報勤職盡瘁爲
訓每曰擇交最難張德遠能親君子不能遠小人
當以爲終身之戒癸卯秋闈編修以不錯題字卷
誤被貼主司坐吏議嚴譴詔許覆試公愀然曰
罪及主司而自干進可乎既不入式公意始帖然
嘗述陳仲醇言教諸子曰美酒速飲而無味積薪
居上而先焚仕宦之塗惟宜漸進此語頗得黃老

意宜深味也公雖家居乃心王室滇逆之變憂思
沉瘁每飯不忘侍郎時省覲假歸公趣令治裝謂
老特狍猖必當懸頭竿杪況 廟堂宵旰非臣子
家食時也侍郎在翰林凌晨進講日旰乃出最勤
苦性淡泊不肉食日粗糲一盂公貽書曰此非養
身之道食不厭精汝未讀鄉黨篇耶退直後宜靜
坐片刻養神節勞勿以膏自焚也古樂府殺君馬
者路旁兒謂竭馬之力以娛路旁耳目也吾慮汝
之馬力竭矣侍郎聞命悚懼爲稍節勞加一餐焉
公好急人難三郤婚喪以佐匱請者日踵門必盡

力周卹擇師教其子弟之貧者歲飢捐賑其里人
收育棄嬰造舟濟涉凍者予衣餒者予食孳死者
予槨里人賴之嘗有盜謀劫其室同謀者先期以
告詰之則嘗凍受衣者也郡中數起大獄公每陰
爲救解已亥年沙洲失業山田之人計畝以粟濟
之沙洲旣復業山田連歲大旱公言于有司令洲
民如數還償全活甚衆所著撰有閩遊草艾衲亭
存稿文陸堂文稿各如干卷文陸者有慕文待詔
陸平泉之意江寧通志則應總督永寧于清惠公
禮聘與纂修筆削者也余甲午充貢與公長子編

修同入太學謁公邸舍一見待以國士余試失利
公笑曰爾豈風塵中人勉旃自愛余兄弟與編修
侍郎交好公聞甚喜余過京口引余遊鶴林北固
劇談累日夕壬子京兆之役公子仕可名在第二
公手書謝曰兒子成名得足下爲座主乃真足喜
自此凡進退出處及有事蓄疑未決必以咨稟公
傾心相告亶亶不倦嘗曰范希文善教其子以胡
翼之孫明復石守道李泰伯爲堯夫兄弟師友自
然學識日進吾諸子它日當有成就足下其共切
磋又言范蜀公謂仕宦不可廣求人知受恩多則

難立朝矣劉忠宣亦持此語然若果有知己詎宜
背負如魏知古之待張說明皇薄之是已又言張
江陵爲館師令門人與上計吏往還詢知郡國阨
塞營伍戶口財賦爲他日經濟不宜徒守章句爲
無用之學又言君邑鄉先生葉文莊公掌兵科與
于忠肅共講兵事一日議不合廷劾忠肅遜謝而
已前輩虛懷如是非有矯飾文莊公嘗訪一新進
士方與同年圍碁厲聲曰君輩初釋褐當知吏事
乃博奕遊戲取碁局投之於河陶荊州惜分陰吾
曹當知此意也公鏃礪獎借手書盈尺居常維念

公之期許有非淺劣所敢承者蓋深愧荷其言公
計至余哭之侍郎邸舍賓主拾踊瀕行余送之復
相向哭侍郎以公行狀爲屬曰我先公知子也案
古者累行以論諡謂陳其生平行迹爲作諡之本
唐時士大夫沒質狀其行事上太常請諡史館立
傳苟行不應予諡并爲之傳者不作也故下位高
節之士往往有狀貴公鉅卿反或不必要盡有其行
應予諡并爲之傳宜無過公者今令甲非大臣官
二品例不得請諡若上之史館取信後之執筆爲
史者及以請墓文故不宜闕余辱公知其何可無

述也公生於明萬曆四十六年戊申卒於 皇清
康熙二十三年甲寅享年六十有八配何氏累封
淑人子男子六玉裁丁未進士內國史院編修加
一級前卒娶蕭氏贈安人繼娶申氏封安人玉書
辛丑進士經筵講官禮部左侍郎兼翰林院學士
加一級支二品俸娶吳氏贈淑人玉禾貢生候補
行人司司副娶蔣氏仕可丙辰進士候補中行評
博娶繆氏恕可戊午舉人娶于氏繼娶徐氏與可
例監生娶何氏繼娶徐氏子女子四皆適名族孫
九人孫女五人康熙二十三年歲次甲子冬十二

月崑山年姪徐乾學頓首謹狀

皇清敕封儒林郎翰林院修撰先考坦齋府君行

述

嗚呼痛哉先府君棄不孝乾學等四年餘矣痛念
先府君頭髮甫艾遽捐館舍乾學等雖稍得成立
而承歡之日甚少殆不如田夫賈豎得朝夕出入
奉其親者萬萬也乾學等終天之恨何時得釋拊
心泣血悲悔難追嗚呼痛哉先府君之葬以丁未
陬月時在草土中奄忽一息未及排纘先府君行
實以求鉅公之文勒諸不朽今墓草已枯而壙間

誌石及夫麗牲之碑闕焉未備每一念及五內崩
推用敢略述事實如左惟當世先生長者哀憐之
賜以銘誄表章先府君之盛德少逭不孝乾學等
之罪戾乾學等雖死之日猶生之年也謹按府君
諱開法字茲念別號坦齋先世朴菴公諱良力農
成家居崑山之墩上再遷湓濱村爲吾徐氏始祖
府君五世祖刑部主事南川公諱申弘治甲子舉
人任蘄水上饒知縣舉卓異爲刑部主事以爭壽
寧侯獄廷杖事載國史刑部生交河主簿在川公
諱一元嘗在嚴文靖公幕爲草蠲糧疏得請全活

百萬人江南人至今稱之交河生封林翰院檢討
鳳池公諱汝龍檢討生萬曆癸未進士太僕寺少
卿端銘公諱應聘即府君之大父也太僕端方高
潔自史館歷任卿寺爲時名臣府君生三歲而太
僕歿于京師府君之考太學舍孺公諱永美中乙
卯副榜蔚然儒宗執太僕喪毀瘠骨立踰年而卒
時府君甫四齡也妣潘孺人爲上海光祿丞諱元
升女性至孝撫孤成立備嘗苦辛邑中皆稱節孝
徐母府君少英敏讀書輒數行下十二屬文落筆
輒驚長老潘孺人每色喜曰是必興徐氏兩姑嫁

時府君方童子佐潘孺人經紀周悉與叔父弦佩
疾痛痾瘥交相憐惜同邑宗伯顧公嘗曰今之顏
含庾袞也十五補博士弟子即有聲庠序從茅君
蘭胡秋卿二先生遊君蘭素剛介嘗恨同邑相君
爲人相君亦銜之一日過相君門蒼頭十許奮拳
毆君蘭幾殆府君聞之憤甚會邑中諸生忼慨流
涕切責相君以報君蘭不幾時而相君敗于是里
閭皆言府君少有氣節云十七娶吾母顧安人十
八而生乾學踰二年連舉秉義元文吾母固巨室
舅氏都有才華姑適顧宗伯長君憲副諱明時並

廩厚然府君坐間極多寒士與秋卿先生及陸孝廉錫其爲文字之會相切劘甚力一時窮交密戚待府君舉火者十數家賓朋燕會無虛日每赴試郡門秣陵同載者甚衆皆藉供億親朋有急輒奮袂而起以家財助之從父無端爲市虎所害府君詣公堂慟哭嘔血至復讐乃已婁東張南郭顧麟士虞山楊子常諸公府君並與交游以文章往復是時府君聲稱籍甚顧屢入鄉闈不遇旋援例入辟雍家漸落亡何家難倏起爲酷吏所羅織幾不測賴伯父中允念修公營救得免府君由是歷錢

塘過嚴灘陟三衢遊豫章如金溪許亦旦南昌陳
士業及蕭孝廉元聲龔大行佩潛訂交最驩金谿
許灣書賈慕府君名求選制義鋟版以行評論精
當遐方楚粵爭購之紙爲之貴金谿人負府君千
金其人貧無以償輒焚券去西江至今稱之弗忘
癸未還家丁潘孺人艱時家益貧落喪禮務厚弔
者大悅踰年值申酉之會四方鼎沸東南建牙開
府者甚多府君用特薦爲明經角巾儒服條上便
宜數十事如開屯島嶼募練鄉勇諸議皆鑿鑿可
見施行然知時不可爲亟歸杜門稱病雖纁帛交

錯弗應人服先幾之哲焉 本朝定鼎府君絕意
進取惟課督乾學等焚膏繼晷乾學等咿唔丙夜
府君未嘗先卧選今古文辭手自繕寫令乾學等
誦習乾學初操觚爲文一脫藁先呈府君稍不當
意即加箠撻不少寬貸每赴小試府君待棘門外
出即令誦試作未甚紕繆即心喜否則對衆呵責
蓋自乾學兄弟數齡以至成人府君未嘗暫離嗚
呼痛哉非先府君勤勤懇懇教督乾學等何能稍
得成立以至今日而未嘗享一日之養其悲痛爲
何如也府君雖隱居不仕而於東南利病瞭若指

掌當事者多欽重府君名德或式廬咨訪府君條
列興革事宜如渠疏雷決灑灑不滯方漕政大壞
弁丁苛索無已府君謂必止本清源方可以治其
驕橫宜先自倉場總漕更弦改轍歷考前明漕規
以及弊政附以已議曰漕政考要言甚痛切又以
蘇松賦重屢向當事昌言宜倣耶律楚材舊制或
量爲減損以甦民困雖不見用聽者歎服郡邑間
陰受府君之德而不居其功者不可勝數不孝兄
弟誦讀之暇府君輒述嘉言懿行以造就乾學等
每遇人有快心事爲鼓掌色喜人或負冤不平即

咨嗟太息若推納溝中者府君立志行善慷慨好義無時不然也于書無所不窺尤精熟司馬溫公通鑑著有甲子會記考證家世習易府君哀集諸註疏而歸于簡約至爲精要邑中讀易者皆以府君爲宗又嘗旁搜故實及宇內誌乘凡錢穀盈詘與夫科名盛衰人材進退之間無不熟記自洪永以來甲乙二榜蒐討至備皆親自抄錄今手澤具存也嗚呼痛哉府君家雖貧施予不倦鼎革以後凡戚友舊有所貸者悉焚其券家事藉吾母經理意落落如也甲午元文登賢書諸先達以器識謬

許府君喜曰不隊家聲矣時某以選貢同北上府君貽書累數百言皆束躬應物之箴已亥元文成進士

世祖章皇帝親擢對策第一嘗召至便殿問家世及父母年幾何兄弟幾人元文具對

世祖嘉歎久之曰爾可當孟子一樂矣煌煌

天語同朝以爲元文榮詎意十年之頃而有攀髯之淚風木之悲也嗚呼痛哉府君初得報即寓書長安推本祖宗積德以訓勉元文語必懇至庚子歲府君至都門元文迎拜潞上慰勞畢言不及他

問所習國書若何猶向時之督課業者食不過五
簋乾學等所進新衣不肯服朔望騎馬過慈仁寺
見靡麗諸物未嘗一顧曰吾以儉德教汝曹耳是
歲乾學應順天試撤棘之日府君冒雨至京兆閱
榜乾學幸得與名亟出語元文曰吾向留都門者
欲見汝兄京兆榜也明日遂登舟南下途次知妹
壻申穉舉南省解元妹爲吾母所憐愛府君聞之
益喜然每語穉云勉之勿負科名也辛丑以

今上登極覃恩勅封如元文官是年亮采生元文
嘗奉使豫章便道觀省跪進章服府君追思太

學公潘孺人曰此汝祖父母種德所致淚淫淫不能止癸卯府君五十初度時秉義援例辟雍獨乾學在家友朋在千里之內與乾學兄弟交者率過敝廬稱觴上壽瀟浦之濱舟車闐咽所貽詩歌古辭累千百篇府君曰兒能交當世賢人君子吾所喜也惟是道糧一案不孝兄弟爲吏誤開掛議雖旋得剖明府君稍稍弗懌然興致尚不衰減每花晨月夕與二三故人及子孫飲酒談笑盡醉而止有薄產在松江數往滬瀆練川及茸城由拳間自製一舟徜徉二三百里之內府君事事陰行善與

人交財絲毫不爽有所諾終身不忘樂鼓舞人材
有一善心爲稱揚性質直無城府不喜齷齪苛禮
少年後進詣府君送不至闕待叔父至厚有急屢
分財以應有從子貧不能娶府君代爲納幣嘗買
一妾詢知曾許字人即訪還不受值滬上靜安寺
鄉有王葉二姓指腹爲姻以所生男女相易撫養
後王氏子親歿家業替落葉即欲以女嫁近境富
室秦姓而逐其壻油坊飯牛府君聞知招葉至流
涕語之令擇日與王壻成婚裝奩花燭皆府君辦
具卒完其故盟嘉定眞如鎮陶圓者生女有姿色

駟僧誘之賣娼家娼家隸王副將麾下有司莫制其父母哀號府君與王副將力爭自以五十金贖歸其父母諸生夏震熙以非罪繫獄常曰徐封君來必救我府君京師歸夏已瘦死聞之以爲恨出金葬之逋糧諸生應逮赴刑部者府君代爲輸納免其縲紲扶植貧士不遺餘力以故府君易簀之後四方弔者皆哭失聲先世通家如歸安沈襄愍丹陽姜奉常之後歲通往來嘗語不孝等曰此祖宗以來通門舊好也先刑部先太僕清修重德府君倡議請于學使得崇祀鄉賢鳩宗睦族百廢具

舉人有得罪府君者當時或不能平過即忘之御
僮僕甚寬素不殺生宴客常用乾肉絕愛憐兒女
雖孫女幼殤哭之必慟平時教督不孝等雖嚴有
疾病噢咻倍至府君雖少年不治生產獨為不孝
等計甚周悉府君素強健受封以後不多乘肩輿
緩步城市召客常設樂飲酒三爵之後或隱几而
卧勦聲與絲竹相間然客語皆能記憶凌晨必辨
色而起居恒不多飲遇佳節或快意時則連引巨
觥不醉不好博奕遊戲間一為之即棄去燕居匡
坐或攤書而卧人謂府君神與天全必享期頤之

壽而竟不然嗚呼痛哉府君病之前月率秉義及
孫樹穀樹聲等載酒携榼步馬鞍山下欬歔流涕
謂人生聚會不可多得撫樹穀樹聲者再三秉義
瞿然曰大人奈何爲此語孰知負杖行歌七日而
驗樹穀補弟子負秉義領鄉薦府君俱不及見耶
嗚呼痛哉不孝等罪通于天罹此酷罰尚泚筆以
述府君生平之萬一冀稍寬其罪戾雖仁人君子
賜之矜憐不孝等撫心自問真所謂有靦面目者
矣府君生于萬曆甲寅三月廿五日歿于康熙五
年三月廿一日 覃恩敕封翰林院修撰享年五

十有三娶顧安人係春坊贊善學海公諱紹芳孫
女官生仲從公諱同應女子四長乾學由甲午選
貢中庚子科順天舉人庚戌第一甲第三名及第
內弘文院編修娶金氏癸未進士晉江知縣際昇
公諱允治姪女太學際熙公諱允洽女次秉義已
酉順天舉人娶馬氏丁亥進士河曲知縣漢翔公
諱雲舉女次元文甲午舉人已亥第一甲第一名
及第歷任內秘書院侍讀娶湯氏前壬戌進士刑
部主事炎洲公諱本沛孫女文學卿謀公諱傳楹
女俱安人出次亮采聘張氏乙未進士王部員外

揆原公諱有光女庶母程氏出女二長適陸最邑
庠生係壬午舉人錫其公諱嘉胤子次適申穰庚
子解元辛丑進士今爲內弘文院中書舍人係中
書舍人孝觀公諱縝芳子俱安人出孫男六樹穀
邑庠生乾學出娶葉氏庚戌進士太常寺卿香城
公諱重華孫女恩貢崙生公諱方至女樹聲元文
出聘李氏文學寧臣公諱思贊女樹炯乾學出聘
莊氏前戊辰進士刑部侍郎素鶴公諱應會孫女
己丑進士刑部主事前翰林院檢討靜菴公諱朝
生女樹本元文出聘宋氏丁亥進士都察院右副

都御史直方公諱徵輿孫女官生河宗公諱泰淵
女樹敏乾學出聘黃氏太學魯望公諱璠女樹屏
乾學出聘蔣氏文學雲九公諱之達女孫女三俱
乾學出一許字張介眉文學濟臣公諱曾愈子一
許字李邦靖乙未進士湖廣提學僉事元仗公諱
可汧孫文學東序公諱遙章子一許字葛世隆庚
午舉人瑞調公諱彙孫文學敬升公諱雲漢子今
爲外祖戊戌進士萊蕪知縣媚初葉公諱方恒撫
養府君遺命與祖父母同窆先是祖墓在高巷以
陰陽家言不吉奉遷權厝丙舍府君時用愀然乾

學等於康熙六年正月初九日卜葬大瀟浦信字
圩之新阡準禮意奉祖父母柩居左府君居右稍
下將於墓前爲坎下誌石而更立墓表按晁補之
集從弟保之旣葬其父推官久之始求補之爲銘
詩納之塋中以詔後世補之葬壽光太君踰年求
杜侯紘爲誌而朱晦翁亦久之爲其考妣請銘於
益國周公惟大人先生勿以踰時爲責賜之片言
以光泉壤不孝乾學兄弟死且不朽

先妣顧太夫人行述

嗚呼痛哉不孝乾學等罪重孽積禍延所生先大

夫捐館十有餘年今吾母顧太夫人又長棄不孝
乾學等矣嗚呼昊天罔極爲人生莫大之痛而吾
母天下之賢母也自相先大夫以及教育不孝乾
學等備歷艱難荼苦首端乾學等稍稍仕進輒離
家庭雖間回省覲及迎至京師未曾有歲月之
娛養吾母四十後善病已亥病劇甚輒愈間一二
歲有疾肯往往即瘥乾學等私謂吾母精神雖似
弱服藥餌輒效年六十髮未半白素種德行善天
之報施不爽可冀享期頤之壽而猝然遘疾不起
嗚呼痛哉吾母病以十月二十四日至十一月七

日長逝乾學元文身在京師弗獲親視含殮蓬
跣歸籍抱痛終天秉義亮采雖家居奉養侍藥無
狀負罪莫逭嗚呼痛哉吾母系本同邑顧氏高祖
思軒公諱濟正德丁丑進士刑科給事中曾祖觀
海公諱章志嘉靖癸丑進士南京兵部右侍郎祖
學海公諱紹芳萬曆丁丑進士左春坊左贊善兼
翰林院編修並著名績父賓瑤公諱同應官廕生
清修篤學負東南重望母何夫人淹洽書史爲女
士師吾母年四歲能屬對誦唐詩賓瑤公撫之喜
曰惜哉不爲男子賓瑤公即世何夫人憐愛吾母

教以詩書及工組紉之事無不精曉年十五歸先
大夫贈侍郎公事先王母潘夫人先意承顏孝謹
備至滄瀨之奉必躬親之治家中事肅然有條理
一不以煩潘夫人潘夫人嘗稱于宗戚曰吾樂有
賢婦先大夫好交游結賓客文酒之會無虛日吾
母潔治杯匜往往盱食或親朋緩急求貸輒解簪
珥傾筐篋應之先大夫以是得交四方賢士以有
聲譽先大夫屢失利塲屋家道替落門戶多累外
侮內訌遭酷吏幾不測吾母以一女子竭誠營解
心力俱瘁卒得免于難時乾學等雖數齡無知已

略識吾母計畫周密辛苦卒瘁之狀嗚呼痛哉潘夫人歿以癸未歲吾母摧痛幾不能生一切後事必誠必信至今三十餘年遇寒食孟冬掃祭丘壠吾母思念潘夫人未嘗不悲慟如初喪也何夫人晚年多病吾母時迎養于家其終也含殮周至每寒食掃徐氏先塋畢即上賓瑤公何夫人塚吾母之篤孝如此嗚呼痛哉先大夫數遊豫章閩越及諸鄰郡徭賦逋責之事百端交集吾母一身仔肩延師課乾學兄弟束脯必極豐當歲祲穀貴吾母日咽麥飯不使諸兒知而令諸兒侍師食食必腆

潔乾學兄弟踰年後乃知之吾母自紡織以及女
紅針指無不手自爲之歲耕瘠田若干畝以時播
種耘獲常親詣溝塍督村僮力作築塲納稼寒風
淅瀝夜分不肯休吾母自勞苦如此嗚呼痛哉吾
母課乾學兄弟至嚴所讀書必覆校背誦丙夜未
嘗先寢遇師他出即親爲教授并講說書史及士
人立身行已大節乾學兄弟寢共一榻吾母數于
牖外訶聽若譚論經書文藝則色喜或閒語博塞
遊戲即怒甚召起切責或加夏楚吾母衣裙多帶
管鑰恐不孝兄弟覺輒手執以往勿令有聲

興朝鼎革之會時事糾紛邑中豪不逞之徒設立部黨所在洶洶先大夫往來雲間吳門吾母提挈三子一女避亂高巷張浦間一日聞先大夫將訪故人某吾母攜乾學操舫艤迎歸張浦未幾湖淞如沸羹而城中亦遭兵燹吾家獨得無恙張浦窮村一室僅方丈矮屋柴扉晝昏如夜吾母教乾學兄弟讀史漢古文不輟鄰居年少宦家子欲與乾學交吾母察之曰此非端人必隳其家絕之勿與通至爲之徙寓未幾其人即敗吾母欲不孝兄弟與端人正士游處不使稍暱近小人自成童已然

嗚呼痛哉乾學旣補弟子貢次年秉義元文同入學宮吾母佐先大夫督課彌嚴所作制舉業常親自披覽每赴試金陵弁資乏缺貸重息以俶行裝而吳門梁谿婁東數有文會不孝兄弟厠遊其間敝居小瀟之浦賓客過從吾母多方拮据飲饌豐備人不知爲貧家者諸凡古今治亂之幾當世得失之故吾母皆能指其大槩洞中窾要親黨有違言得吾母一語即悅服吾母無矜色無躁容氣和而心平藹如也及論事剖疑是非可否侃侃然言之至明且智者無以易二三十年來東南大家推

三
九
十
二
吾母爲鍾爲郝豈徒然哉嗚呼痛哉甲午元文舉
于鄉乾學選入成均偕如京師將行吾母誨之
曰此汝曹策名之始立已交友不可不慎旣至
京手書諄復今思之如昨也嗚呼痛哉元文擢進
士第一人咸謂吾父母教誨所致吾母曰此祖宗
所貽廼父所教於我何有追憶潘夫人不及見孫
子成名淚涔涔不止是冬吾母得血症幾殆誠乾
學秉義勿使汝弟知恐以吾故貽厥憂曠乃職業
負朝廷恩值武林陸麗京善醫乾學自吳趨迎
之至舍用藥即效不一月平善明年乾學舉京兆

旋以逋糧一案不孝兄弟名誤在籍中元文謫官
吾母曰仕路進退何常之有其益修德勤學敬官
庀事元文奉教弗敢墮墜後元文奉

旨賜還原官乾學復還舉人丙午遭先大夫之變
乾學兄弟慘痛無生理吾母於哀酷中經營窶空
卜兆吳淞江之陰不數月而幽堂完固漸以種植
松檟興治丙舍事皆具舉非吾母其疇能之嗚呼
痛哉服除次年己酉秉義舉京兆又一年乾學擢
進士及第吾母貽書 京邸深以盛滿爲懼汝兄
弟有何德而叨冒科名其益臨深履冰無替吾訓

又三年秉義復擢第吾母之教誡者彌嚴且切嗚呼痛哉當庚戌歲乾學元文迎養 京師孟冬十

月入 國門以畏寒不能久留踰歲壬子二月登

舟回南乾學元文拜遂潞上惟勤勤勉勵無慘沮之色乾學壬子典試疎誤獲罪當左官吾母書到絕不以爲意如辛丑之教元文也癸丑歲吾母偶得黃腫疾屬家人勿使不孝兄弟知兩月而愈乾學時方候補聞之馳歸吾母健飯如常矣吾母生平備極辛勤故晚歲往往易病病幸輒愈脉虛寒宜參附姜桂之屬詎意一病不可復療耶嗚呼痛

哉昨歲吾母六十初度獨乾學侍膝下 京師諸
公並以詩文相慶賀而四方名賢長者多在過陳
祝嘏之詞自歲首至孟秋未已吾母覽誦諸公文
辭遜謝而已心以得賢人君子一言爲喜諸公祝
詞皆謂吾母當得上壽而豈知踰年遂棄養耶嗚
呼痛哉吾母過介壽之日促乾學治裝北行勸諭
再三然拜別之時戀戀不忍舍非如曩者潞上詞
色今歲遣乾學婦入 京送至毘陵諸孫勸之歸
曰姑再聚斯須口不言而黯然神傷矣嗚呼痛哉
乙卯之秋秉義奉

命典試浙闈事竣便道過里居吾母勉以

王命促之赴京既復

命即以病告歸方謂有子奉養膝下得遂晨昏之樂不意定省甫踰月而吾母已病嗚呼痛哉吾母讀書明理了然死生之際與世緣一無繫戀獨是在徐氏爲婦爲母成家肇業四十七年其忍一旦棄乾學兄弟而逝耶嗚呼痛哉吾父納庶母程氏生亮采今十六歲遇庶母恩意極厚撫亮采不異所生延名師教誨衣服寒燠至周以詳爲聘青溪名族凡納采問名之禮親往其地手自區畫吾母

自奉儉約衣必累澣上服半用布素中裙相衣不用綺縠食不過二豆上壽之日子婦諸孫進觴戒勿設盛饌止陳蔬食果核而已左右婢妾不欲多取給事而已未嘗輕訶責宗黨婦戚之貧者待吾母以舉炊吾族之尊年及吾姑吾從母以時饋問族姓不能延師讀書者佐其束脞不能聘娶者代爲納徵從母之女撫以爲女爲具資裝嫁之見人阨急咨嗟太息必營救乃已猶記壬辰之歲先太夫坎壈患難之時有向乾學兄弟貸三十金者乾學知家酷貧不敢以告母知急措如數畀之好施

樂善始終未嘗有倦其素受吾母恩德而背負者
不之較也不孝兄弟薄俸奉吾母輒施予貧民冬
給絺衣夏施帷帳死不能殮者予以槨病者助以
藥下至獄囚亦散賑錢米素不殺生所放禽魚羸
蛤無筭以故吾母長逝之日合邑親黨而外街衢
巷陌無男女老幼皆流涕嗚呼痛哉吾母自少及
老謙和溫粹不以一言傷人不一事先人乾學
兄弟在仕路昕夕馳戒勿忘先德勿忘隱約勿忘
患難蓋數數言之書牘盈篋笥也嗚呼痛哉諸孫
成童即諄諄誨諭一切耳目嗜好不得雜進諸子

女及內外孫女孫在襁褓卽告乳婦勿嘻笑勿多
言勿詬誶恐子女少德性略有漸染也孫曾孫抱
撫弄顏色和而必莊申氏諸外孫吾母多撫育之
雖至憐愛與之言未嘗露齒盛夏服絺衣必再襲
雖宗戚遣婢僕來未嘗慢忽性無他好治家之暇
惟以讀書覽古聞善言見善事爲愉快子孫衣服
過華卽不樂易之乃已約束僮僕嚴而有恩吾母
之啓後昆皆以身爲教也嗚呼痛哉吾母素精內
典多所證入乾學兄弟于釋氏之書茫然不知吾
母談述梵夾及五宗源流如數列眉昨歲乾學陪

侍過鄧尉支硎間愛華山泉石之勝留連三日日
夜論宗旨乾學雖懵懵未省而已知吾母所得深
矣特未嘗輕以語人所告者尋常日用之事而已
嗚呼痛哉吾母生平事事皆可爲範郡邑無不知
之乾學兄弟罹此荼酷以淚和墨略書梗概吾母
淑型懿矩豈止是耶嗚呼痛哉辛丑恭遇 覃恩
吾母受安人封庚戌晉封太宜人乙卯晉封太夫
人凡三受

恩綸吾母彌自謙約不肯一日稍宴佚也嗚呼痛
哉吾母生于明萬曆丙辰七月二十八日未時終

三原熙丙辰十一月初七日辰時享年六十有一
子四人長不孝乾學庚戌進士及第右春坊右贊
善兼翰林院檢討娶金氏吳江文學際熙公女封
安人次不孝秉義癸丑進士及第翰林院編修加
一級娶馬氏同邑丁亥進士河曲知縣嵎輪公女
封安人次不孝元文己亥進士及第 經筵日講
起居注官翰林院掌院學士兼禮部侍郎加一級
教習庶吉士娶湯氏長洲壬戌進士刑部主事炎
洲公孫女文學卿謀公女封夫人次亮采監生庶
母程氏出聘張氏青浦乙未進士工部員外郎揆

原公女女二長適邑庠生陸最係壬午舉人錫其
公子夫婦俱卒次適吳縣辛丑進士禮部祠祭司
主事加一級申稷係中書舍人封禮部主事孝觀
公子孫男六人樹穀乾學出選拔貢生娶葉氏同
邑戊辰進士太常寺少卿香城公孫女貢生崙生
公女樹聲元文出附例監生娶李氏同邑文學寧
臣公女炯乾學出監生娶莊氏武進己丑進士見
任提督河南學政僉事前翰林院檢討靜菴公女
樹本元文出監生娶宋氏華亭丁亥進士都察院
左副都御史直方公孫女官廕河宗公女樹敏乾

學出府庠生聘黃氏吳縣候選州同魯梁公女樹
屏乾學出聘蔣氏吳縣候選知縣雲九公女孫女
三一適太倉州增廣生張介眉係文學濟臣公子
一適府庠生李邦靖係同邑乙未進士提督湖廣
學政僉事元仗公孫廩監東聚公子爲文學獻于
公嗣一許字邑庠生葛世隆係同邑候選州同敬
升公子俱乾學出曾孫男五人德俶德份德縣樹
穀出德寅德咸俱樹聲出曾孫女三乾學兄弟肝
腸寸裂語無倫次伏惟大人先生賜之片言以光
泉壤乾學兄弟雖死之年猶生之日不勝激切哀

號之至

憺園文集卷第三十三